

DU L'NÎVE AL POTASSE .

(pa in martchand d' angrais.)

Dju nous a souvêrans, du l'hiviêr 2010. C'est dmwin Noyé et vla in gros mwès k' onz est al nîve, et nin in pô. La spècheur su les hyôts avèjine lu mète, dins nos viadjes doule basse Ardène, on put compter 80 cms bins fwêts. Gn'è des anéyes k' on n' avot pus vû ça, et surtout si hyeur (tôt).

I fât minme aspêrchî les camions d' rouler su les grandes voyes pou èviter k'is n' su mêtinjent du traviêrs et parolizer la circulacion. C'est nin ça ki fwêt l'afwêre des tchâfeus.

Nin contints d' ça, c'est l' sé (sel) ki vint à manker ; onz è cminci pa vinde lu sé agricole, pîs le sé d' cwizine et l' gros sé pou les saler les couchèts et i n' dumeure pus asteure ku dul kaïnite, in sel du potasse ku les cinsîs ont samé des anéyes au lon, ca on n' avot k' ça et du basique. Dju câze jusk'às anéyes 1950-60 duvant d'awè les angrês complets.

Dju vins d'awè ène pratike pou du sé et dju n'ê sû lî mète ku dul kaïnite. Mu brave chaland, ki va pourtant souvint an Alsace, est sté tout sbaré ku dju lî aprinje ku la kaïnite ku dj' ê counu vunot adon d'Alsace. I n'avot jamwês atindu câzer d' ça.

Et dju lî don apris ku la potasse, àl mwâte sêzon, vunot d'Alsace, pa trins complets, ki passint la frontiére à Ecouviez - Lamorteau, pouz' èsse, dud' là, rèpartis , par rames du 60 tonnes (3 wagons du 20 tonnes) dins l'ansambe des provinces du Namur et Luxembourg, k'astint trop lon d'Anvers.

On rçiot dul kaïnite à 11% du K²O (*oxyde de potassium*), des « sels du potasse » ki fjint 20% et du « chlorure de potasse » ki fjot 40%.

Ces engrais-là, adon, nous fjint vèy bin du timp. I nous arivint dins des wagons raclos, « fermés » coume on djot, et i falot, à l' sucoube, pèlter tout çà pa l'uche du wagon, dins l' bègnon, pîs après dins les camions, pou les ramonner dins nôs magasins.

In còp baculés àl tère, i falot les rtaper in deujime còp pour à faire des tas du 3-4 bons mètes du hiôt, su 10/12 mètes do long et 4 mètes du lådje. Onz î parvunot à les rtapant à deus còps. La potasse nous avot djà passé 3 û 4 còps dins les mwins.

Et les tas dmèrint là des mwès duvant d' les samer.

Et c'est cidlé, ku la potasse, ki n'est en some ku du sé, pûrdot l'humidité dl' êr et duvnot dère coume du bèton.

Cand la sêzon des samadjes arivot, i falot r'prinde tous les tas à l' pioche, pou polu les pèser et les assatchî. Adon, tout s'fujot co al mwin, à pârtu des satchs.

Peser et assatchî astint les catrime et cinkime còps k'on pougnot dins l'angrês.

Chance k'onz'ére djonne !

* * * * *

A cázant, dju n'âros pu sù dire dins ké costé du l'Alsace su trouvint les mines.

Lu timps d' voler su « Google » et on plot rusponde à ttafwêt.

La production dul potasse d'Alsace rumonte à 1910, après awè sté duscovrue pa des oumes et ène fame : « Amélie Zûrcher » à 625 mètes du fond et su ène surface du pus du 200 km², à Nord du Mulhouse.

Jusk'an 1947, toute la bzougne s'è fwêt bramint al mwin : des oumes et des tchfàs. Après la guêre du 40, les grosses machines ont pris lu rlês (*relais*).

Dins les deus mines co dovrues, on tire 45.000 Tonnes du sylvinite (*sels bruts de potasse*) par djoû. An 1987, pou l'anéye, ça fjot 10.900.000 Tonnes.

Asteure, c'est des rogneuses ki grêtat l' min'rê, ki, su des sâtrêles, voyadje des kilomètes, pouz ariver jusk' ou pwisse (*puits*) ki l'rumonte al surface.

A pârtu d' là, les sés d'potasse, à pârt la kaïnite, ki n'est ku broyê à gurzês d'in mm. û deus, sont trêtés pou satchî fû les nichtés et l'sé k' est d'trop, et ariver insi à z-à fwêre des engrais ki dôzat d'pus (40, 50 et minme 60 % du K²O).

Pou les cultures pus délicats ki n' supwârtat nin l' chlore, coumes les lègumes, les canadas, lu houblon, lu toubac, on tchandje les chlorures an sulfates. C'est les engrais les pus raffinés et les pus ritches an potasse.

La potasse dumeure toudi yink des èlèmants indipansabes àl créchin.ne des plantes.

* * * * *

Dj' a n'an dit assez pou anute. Vla co k'i rnîve !

Louis Baijot 23/12/2010.